

PAULO TỸ CARTA HAN: GALÁCIA TÁ KE AG MỸ CARTA

¹ Paulo tỹ rá vễ, inh. Tỹ sóg *apóstolo* nĩ. Ēprã ke tỹ inh fêg pijé'. *Jesus Cristo* hã vỹ inh fêg, êg jóg tỹ Topê mré, ù tỹ *Jesus* rĩn mãn mũ ên ti. ² Sỹ inh mré ke ag mré ga tỹ *Galácia* tá ke ag mỹ rán hã vễ, fag mỹ ke gé, ù tỹ *Jesus* to vẽnhmãn tĩ kar fag mỹ.

³ Topê mỹ sóg to vĩ tĩ, ti tỹ ãjag tar han jé, êg jóg mág tỹ ãjag krĩ kuprãg jé, êg pã'i tỹ *Jesus Cristo* ti ke gé.

⁴ Ti hã ne ù tỹ ti tén mũ ag mỹ vẽn fêg', ti tỹ êg tỹ Topê vĩ mranh tỹ tũ' he jé. Kỹ tóg êg kren han, êprã ke jykre pãno to. Êg jykre pãno nĩn kỹ tóg êg mỹ ùn tãg nĩm, êg tỹ ti ki ge kỹ. Êg jóg tỹ Topê tỹ nén ve sór mũn hã vễ. Ti hã ne *Jesus* mỹ tag tó ja nĩ'. ⁵ Kỹ êg tóg Topê to vĩ há han ke mũ. Kỹ êg tỹ ti to vĩ há han tag vỹ tũ' henh ke tũ nĩ. Hã vễ.

Jesus kãme pir nĩ

⁶ Ājag ne tóg kãnhmar sỹ ãjag mỹ *Cristo* tó ja ên tovãnh sór mũ', ti tỹ êg jagfy ter ja kãme ti. Ti kãme ù nón ãjag tóg mũ sór mũ, *Cristo* tỹ êg mỹ tó ja tũ nón. Inh mỹ tóg e tĩ mỹr, ãjag jykre tag ti. ⁷ *Cristo* kãme vỹ pir nĩ, kỹ ti kãme ù tóg tũ tĩ. Hã ra ù ag tóg ãjag krĩ kufy han sór mũ. Û tó sór ag tóg mũ mỹr, *Cristo* jykre to, hã vỹ: “ãjag krenkren jé ãjag tóg *Cristo* ki rã kar kỹ *Judeu* ag jykre han ke mũ gé, Topê tỹ *Moisés* mỹ nén tó ja ên ti,” he mũ. ⁸ Hã ra sóg ãjag mỹ tó há han ja nĩgtĩ, isỹ ãjag mỹ: “ti ki rã

tãvĩ han jé ãjag tóg ke mũ,” hen kÿ. Û tÿ inh vĩ tag ri ke tó tũ ag jé mũ kónãn. Hên ri ke mũn kanhkã tá Topê tÿ jênê jafã tóg isÿ tó ja ên ri ke han ke tũ nĩ, pãte tóg hên ri ke mũn nén ù tó sór mũ. Kÿ ti jé tũg kónãn. ⁹ Tag tó ja inh nĩ, kÿ sóg tó mãn mũ sir. Û tÿ ãjag mũ *Cristo* kãmén kÿ, hã ra tóg ãjag mũ isÿ tó ri ke han tũ nĩ, inh vĩ pãte tóg ù tó sór mũ, kÿ ti jé tũg kónãn.

¹⁰ Vĩ tar han sóg tĩ, êprã ke kórég ag mũ. Inh pijé ón kÿ ag mũ vĩ há han sór mũ', ag tÿ iso há nÿtĩ jé'. Ag tÿ iso kórég nĩ tag tóg inh mũ tÿ nén ù tũ nĩ.

Isÿ êprã ke ag jykre to jykrén ra inh hÿn *Cristo* tũ ki rĩr ke tũ nĩ vè. Hã ra sóg ti hã to jykrén tĩ. “Isÿ nén tó mũn mũ há nĩ', mũ kórég nĩ vó?” he sóg tĩ, ti hã tÿ inh mũ vĩ há han jé, Topê ti.

Paulo tÿ Topê vĩ hã tó

¹¹⁻¹² *Cristo* kãmén ja inh nĩgtĩ, isÿ ãjag mũ: “ti ki rã kÿ êg krenkren ke mũ, êg tÿ *Moisés* jykre han tũ ra,” hen kÿ. Êprã ke tÿ véké nén ù to jykrén ja pijé'. Û tÿ inh kanhrãn ja pijé'. *Jesus Cristo* hã ne inh kanhrãn', ti hã ne inh mũ tag tó kãn'. Tag to jykrén nĩ, inh kanhkã'.

¹³⁻¹⁴ Isÿ vãsÿ nén han ja mẽ ãjag tóg huri. Tÿ sóg *Judeu* krê nĩ. Hã kÿ sóg *Moisés* tÿ êg jójóg ve ag mũ Topê jykre tó ja ên han tĩ ja nĩgtĩ. To sóg vãsãn mág, hã kÿ sóg inh régre ag pátén, sÿ êg jykre ki króm to tar tãvĩ nĩn kÿ. Kÿ sóg kygnê kÿ: “*Jesus* hÿn ón kÿ vêsÿ Topê han,” he ja nĩ gé. Hã kÿ sóg ti ki ge kÿ nÿtĩ ag vóg kónãn tãvĩ han ja nĩgtĩ, isÿ ag tÿ tũ' he jé. Ag jagãgtãn vãnhan ja inh nĩgtĩ.

¹⁵⁻¹⁶ Hã ra Topê tóg kejên inh mũ *Jesus* to: “inh kósín vÿ tÿ ti nĩ,” hé, isÿ fóg ag mũ, kanhgág ag mũ

ti kāmén jé, ũ tỹ mē ja tũ ag kar mỹ. Ti hã tóg inh mur to hã inh kuprêg. Kỹ, *Jesus* tỹ inh mỹ vênh ven kar inh pijé êprã ke ũ ki jēmē'. ¹⁷ Kỹ sóg *Jerusalém* ra tĩg ja tũ nĩ gé, sỹ ijo *apóstolo* ag mré vēmén jé. Ga tỹ *Arábia* ra sóg vyr, ên kã, kar kỹ sóg tá kãtĩg kỹ êmã tỹ *Damasco* tá jun mãn.

¹⁸ Kỹ, 3 (ke) *anos* tũg kỹ sóg kejên *Jerusalém* ra vyr, sỹ *apóstolo Pedro* mré vēmén jé. Ti mré sóg kurã tỹ 15 (ke) han. ¹⁹ Ên kã inh pijé *apóstolo* ũ ag vé'. *Tiago* hã ve inh, êg *Senhor* jãvy ên, isỹ *Pedro* mré vĩn kỹ.

²⁰ Ajãg mỹ sóg ki hã rán mũ. Inh pijé ón mũ', Topê hã ne ki kanhró nĩ'.

²¹ Tag pãte sóg vêsỹmér ga tỹ *Síria* ra vyr, ga tỹ *Cilícia* ra ke gé. ²² Kỹ *Judéia* tá *Jesus* ki ge kỹ nỹtĩ ag tóg inh ki kagtĩg nỹtĩ ja nĩgtĩ. Inh ve ja tũ ag nĩ ver. ²³ Inh kãme hã mē ja ag tóg nĩgtĩ, hã vỹ: “ũ tỹ êg vóg kónãn mũ ên nēji *Cristo* tó mũ ha,” he mũ. “Vãsỹ tóg, ũ tỹ ti ki ge kỹ nỹtĩ ag tũg sór ja nĩ, hã ra tóg, ũri ti kāmén mũ, nēji,” he ja ag tóg nĩgtĩ iso. ²⁴ Kỹ ag tóg isugrĩn Topê to vĩ há han ja nĩgtĩ, ag tỹ mē kỹ.

2

Paulo jykre tỹ apóstolo ag mỹ há nĩ.

¹ Tag pãte 14 (ke) *anos* tũg kar sóg *Jerusalém* ra tĩg mãn gé, *Barnabé* mré. Kỹ *Tito* tóg êg mré vyr gé. ² Topê tỹ inh mỹ: “ha ra tĩg,” he ja vê. Tá jun kỹ sóg, ag mỹ isỹ nén tó tĩ ên kāmén kãn ja nĩ sir, sỹ fóg ag mỹ nén kāmén tĩ ên ti. Vyr mỹ sóg *igreja* to kófa ag mré vēmén. Sỹ ag mỹ: “mỹ há, fóg ag tỹ *Moisés* jykre han tũ ra, kanhgág ag ke gé?” he vê. Isỹ fagrĩnh mỹ rãnrãj jãvãnh tóg tĩ, hã kỹ sóg ag

ki jěměnh vyr. ³ Kŷ tóg ag mŷ há tĩ, sŷ fóg ag mŷ, kanhgág ag mŷ *Jesus* hã tó mũ ti, sŷ ag mŷ *Moisés* tó tũ ra, sŷ ag mŷ: “ha ãjag gré fár junun kym,” he tũ ra. Hã kŷ ag tóg *Tito* mŷ: “ha kym,” he ja tũ nĩ gé. Fóg tŷ *Grego* vĕ, *Tito* ti. Inh mré tóg *Jerusalém* ra vyr. ⁴ Hã ra ón kŷ *Jesus* ki ge kŷ nŷtĩ ag tóg ti kym sór ja nĩ. “*Paulo* mŷ *Moisés* jykre tovãnh tũ?” he ag tóg iso. Ag tŷ ěg tŷ *Moisés* jykre han mãn ěn han sór ja vĕ. ⁵ Hã ra sóg ag kato tĕ. Inh pijé ag mŷ: hŷ, hé. Ājag jagfy sóg ag kato tĕ mág, ãjag tŷ vĕnh vĩ há hã kri fi jé, *Jesus* kãme hã tŷ ãjag mŷ sér tĩ jé.

⁶ Kŷ kófa ag tóg inh mŷ: “tó kãn ja tũ ã nĩ,” he ja tũ nĩ gé. Vãsŷ ag tóg tŷ kófa tũ ja nŷtĩgtĩ, ge ra sóg ag vĩ jěmĕ sór tĩ, ha mĕ. Topĕ mŷ ti tŷ nĕn ũ tũ nĩ, ěg tŷ ěprã ke ag mŷ tŷ ũn mág nŷtĩ ti, tŷ ũn kãsir nŷtĩ ti ke gé.

⁷ Kŷ tóg kófa tag ag mŷ há tĩ, sŷ fóg ag mŷ, sŷ kanhgág ag mŷ Topĕ vĩ tónh ke ti, Topĕ tŷ inh mŷ: “*povo* ũ ag mŷ tónh tĩg,” hen kŷ. ⁸ Topĕ ne *Pedro* tar han, ti tŷ tŷ *Judeu* ag *apóstolo* jĕ jé. Kŷ tóg isar han, isŷ tŷ ũ ag *apóstolo* jĕ jé, ũn tŷ *Judeu* ag jykre han tũ kar ag. ⁹ Tag ve ag, *Tiago* ti, *Pedro* ti, *João* ti ke gé. *Igreja* to kófa vŷ tŷ ag nŷtĩ. Ěn ag ne inh nĩgé mĕ, *Barnabé* nĩgé ke gé: “há ti nĩ, ãjag rãnrãj ti,” hen kŷ. “Ha fóg ag mŷ tónh mũjĕg, kanhgág ag mŷ, jãvo ěg tóg ũ tŷ *Judeu* jykre han mũ ag hã mŷ tónh ke mũ,” he ag tóg mũ, kófa ag. ¹⁰ Kŷ ag tóg ěg mŷ to vĩ, ěg tŷ ag kã mũ ũn jagtar ag jagãgtãn jé, ěg tŷ ag mŷ nĕn ũ jĕnĕ jé, fag mŷ ke gé. Tag han sóg tĩ mŷr. Inh pijé kã jatun tĩ’.

Fóg ag tŷ Judeu ag ri ke nŷtĩ

11 Kǵ kejĕn *Pedro* tóg ěmã tǵ *Antioquia* tá jun ja nĭgtĭ. Hã ra tóg tá kygnĕ, kǵ sóg ti kato tĕ. Ti mǵ sóg ti tǵ kygnĕ ěn tó. 12 Kǵ *Tiago* tóg kejĕn ti mré ke ũ ag jĕgnĕ ja nĭgtĭ. Ag tǵ junjun tǵg ki *Pedro* tóg fóg ag mré nĭ kǵ jĕn ja nĭgtĭ. Hã ra tóg *Tiago* ag tǵ tá junjun kǵ vyr mǵ jĕg mũ sir. Ti tǵ *Judeu* ag kamĕg vĕ. 13 Kǵ ti mré *Judeu* ũ ag tóg ke mũ gé sir. Kǵ vãhã *Barnabé* tóg ke mũ gé sir. Ki kanhró ti nĭ vĕ, *Barnabé* ti, ěg tǵ jatun mǵ fóg mré jĕn ke ti, ěg tǵ tǵ *Judeu* nǵtĭ ra. 14 Ag kar vǵ kygnĕ kãn, *Pedro* nón. *Jesus* jykre pijé', vĕnh vĭ sér pijé'.

Sǵ ag tǵ kygnĕ tag ve kǵ sóg vĕnh kar rĭnve *Pedro* mǵ: “ha vé, *Judeu* vǵ tǵ ã nĭ,” he mũ. “Ã tǵ tǵ *Judeu* nĭ ra ã tóg fóg jykre han ja nĭgtĭ. Kǵ ã tǵ ne jé ũri *Judeu* jykre han mãn sór nĕ? Ã tǵ ne jé fóg ag mǵ: *Judeu* ag jykre han nĭ, he sór nĕ?” he sóg ti mǵ.

Jesus ki ge kǵ ěg jagnĕ ri ke nǵtĭ

15 “*Judeu* krĕ vǵ tǵ ěg nǵtĭ, kǵ ěg tóg fóg tǵ Topĕ vĭ mranh tĭ ěn ri ke tũ nǵtĭ. 16 Hã kǵ ěg tóg Topĕ tǵ vãsǵ ěg jyvĕn tĭ ěn ki kanhró nǵtĭ. Hã ra ěg pijé tag tigrĭn Topĕ mǵ há nǵtĭ'. ěg tǵ *Jesus Cristo* ki ge kǵ ěg ti mǵ há nǵtĭ. Ti tǵ ěg tǵ ti ki ge kǵ nǵtĭ tag tigrĭn ěg mǵ vĕnh pãte fón vĕ sir. Topĕ pijé, *Moisés* tǵ ěg mǵ vĕjykre nĭm ja ěn tigrĭn ěg mǵ vĕnh pãte fón ke mũ'. *Jesus Cristo* tigrĭn ke vĕ,” he sóg, *Pedro* mǵ.

17 Kǵ tóg ge nĭ. ěg tǵ *Cristo* ki ge tigrĭn ěg tóg Topĕ mǵ tǵ ũn há nǵtĭ. Hã kǵ tóg ěg tǵ ti vĭ mranh kǵ ěg mǵ vĕnh pãte fón mũ, ěg tǵ tǵ *Judeu* nǵtĭn kǵ. Kǵ tóg fóg ag mǵ vĕnh pãte fón mũ gé, kanhgág ag mǵ ke gé. 18 ěg tǵ hã ra Topĕ jykre to: vĕjykre tag han mãn ke tũ ěg nĭ ha, he kar kǵ han mãn kǵ tóg vĕnh mǵ

tĩ sir. Vějykre régre vě sir. ¹⁹ Topě tỹ vāsỹ ěg jyvĕn ja ěn ki kanhró ěg tóg nỹtĩ. Ge ra ěg tóg ki króm ki kagtĩg nỹtĩ, ěg tỹ ki króm sór mũ ra. Hã ra *Cristo* vỹ ěg jykre si tỹ tũ' he ja nĩ. Ti mré tóg krunh to sa ja nĩ, ěg jykre si ti. Kỹ tóg ěg mỹ vějykre tãg nĩm mũ sir, ěg tỹ tỹ Topě tũ nỹtĩ jé. ²⁰ Ěg jykre si vỹ tũ' hé. Hã kỹ ěg tóg ti tũ hã han tĩ, ěg tỹ ver ga kri mũn kỹ. Topě kósin ki ge tigrĩn ěg tóg sir rĩnrĩr nỹtĩ. Ti fe vỹ tỹ ěg nỹtĩ, ěg kar. Kỹ tóg ěg jagfy vĕnh fĕg kỹ ter ja nĩ. ²¹ Ti ki ge kỹ nỹtĩ tigrĩn ěg tóg Topě mỹ há nỹtĩ. Topě tỹ ěg jagãgtãn hã vē. Ěg tỹ: “Topě jykre si ki króm kỹ inh hỹn Topě mỹ tỹ ũn há nĩ,” hen kỹ *Cristo* vỹ fagrĩnh mỹ ter ja nĩ. Kỹ ěg tóg Topě tỹ ěg jagãgtãn tag tỹ tũ' he mũ. Hã tũ vē mỹr.

3

Ěg tỹ Jesus ki ge kỹ krenkren ke

¹ Galácia tá ke', ãjag ne tóg krĩ tũ nỹtĩ ve nĩ'. Ũ nỹ ãjag krĩn kónãn, ãjag tỹ *Jesus Cristo* tovãnh sór jé? Ti tỹ ka to sa ja ěn tó kãn inh mỹr ãjag mỹ, hã ra ãjag tỹ ne jé vāsỹ vějykre ěn han sór ně? ² Kỹ sóg ãjag ki tag jĕmĕ sór mũ, ha mẽ. Ĥjag mỹ ãjag tỹ vāsỹ vějykre si mĩ mũn kỹ Topě kuprĩg tỹ jagrĕn kỹ nỹtĩ'? Vó. Sỹ ãjag mỹ tó tigrĩn ãjag tóg *Cristo* ki ge kỹ nỹtĩ. Kỹ ãjag tóg ti tigrĩn jagrĕn kỹ nỹtĩ ha. ³ Kỹ krĩ tũ nỹtĩ sór tũg nĩ. Topě kuprĩg tỹ ãjag krĩn kỹ ãjag tóg *Jesus* ki ge ja nĩ. Kỹ: “vēsóg ki sóg ti ki rã,” he tũg nĩ. ⁴ Ke tũ nĩ mũ ra ãjag tóg fagrĩnh mỹ Topě kuprĩg tỹ jagrĕ nỹtĩ. Hã ra tóg inh mỹ tỹ fagrĩnh mỹ ke tũ nĩ. ⁵ Kỹ Topě vỹ ěg tỹ nĕn han vãnh hynhan ja nĩgtĩ gé. Ti mỹ ãjag tỹ vāsỹ vějykre ěn mĩ mũ tigrĩn *milagre* ěn

hynhan'? Vó. Ājag tỹ *Cristo* kãme sér mẽ kỹ ti ki ge t McGrĩn tóg hynhan.

⁶ Kỹ *Abraão* to jykrén nĩ gé. Topẽ ki tóg rã kỹ nĩ ja nĩ, kỹ tóg Topẽ mỹ tỹ ùn há nĩ sir. ⁷ Ēg tỹ *Abraão* nón Topẽ ki ge kỹ nỹtĩn kỹ ěg tóg ti krẽ'krẽ ri ke nỹtĩ. ⁸ Topẽ vỹ fóg ag mré kanhgág ag krenkren han sór mũ, ag tỹ ti ki ge kỹ. Hã kỹ tóg vãsỹ rán kỹ nĩ, Topẽ vỹ tỹ rán kỹ nĩ ki. “*Povo* kar mỹ sóg vỹ há han ke mũ, ã t McGrĩn,” he ja tóg nĩ, Topẽ ti, *Abraão* mỹ. ⁹ Topẽ tỹ *Abraão* mỹ vỹ há han kỹ tóg ù tỹ ti nón ti ki ge kỹ nỹtĩ ag mỹ vỹ há han ke mũ gé sir.

¹⁰ Û tỹ vãsỹ vỹjykre ěn ki króm t McGrĩn kren sór mũ ag mỹ tóg vỹ kónãn ke mũ, ag tỹ ge ra mranh kỹ, mỹr, ha mẽ. “Topẽ tỹ ěg jyvẽn mũ tóg e nỹtĩ. Ēg tỹ ki króm kãn ke vẽ. Û tỹ mranh pir han mũ mỹ tóg vỹ kónãn ke mũ, Topẽ ti,” he tóg, Topẽ vỹ tỹ rán kỹ nĩ ki. Hã ra ěg tóg mranh kãn. ¹¹ Hã kỹ, ěg tỹ Topẽ tỹ vãsỹ ěg jyvẽn mũ ěn ki króm sór mũ ra ěg tóg mranh tĩ. Kỹ ěg tóg ti mỹ há tũ nỹtĩ. Hã kỹ tag tóg rán kỹ nĩ gé: “ěg tỹ Topẽ ki ge hã to ěg tóg ti mỹ tỹ ùn há nỹtĩ. Kỹ ěg tóg krenkren ke mũ,” he ja tóg nĩ. ¹² “Ājag tỹ inh vỹ ki króm kỹ Ājag krenkren ke mũ,” he ja tóg nĩ gé. Hã ra ěg tóg ki króm ki kagtĩg nỹtĩ, hã kỹ ěg tóg vãsỹ vỹjykre ěn ki króm sór mũ ra ki króm tũ nĩgtĩ.

¹³ Kỹ Topẽ vỹ ěg mỹ vỹ kónãn ke mũ vẽ, ěg tỹ ti vỹ mranh ja to. Hã ra *Cristo* tóg Topẽ mỹ: “ha ag jagfy inh hã mỹ vỹ kónãn,” he ja nĩgtĩ'. Ti to tag tóg rán kỹ nĩ, ha mẽ: “ũ tỹ krunh to sa mũ ěn mỹ tóg vỹ kónãn mũ, Topẽ ti,” he ja tóg nĩ. Hã kỹ ěg tóg *Cristo* ki ge t McGrĩn krenkren ke mũ. ¹⁴ Topẽ tỹ *Cristo* hã mỹ vỹ kónãn kỹ tóg ěg hã mỹ vỹ há han mũ sir, ti tỹ *Abraão* mỹ vỹ há han ja ěn ri ke. Fóg ag mỹ tóg vỹ há han mũ,

kanhgág ag mÿ ke gé, *Jesus Cristo* tugarĩn. Kÿ tóg ěg mÿ ti kuprĩg jĕnĕg mÿ sir, ěg tÿ ti ki ge tugarĩn.

Jesus tÿ Abraão krĕ'krĕ ag kãfór nĩ

¹⁵ Inh kanhkã', ěprã ke jykre to jykrén nĩ. Kejĕn ũn régre ag tóg jagnĕ mré nén ũ to jykrén tĩ. To jykrén kar kÿ ag tóg rán tĩ. Kÿ ag tóg ag jigji ránrán tĩ gé sir. Tag pãte ũ tóg sir tÿ nén ũ han mãn ke tũ nĩ. ěprã ke jykre hã vĕ. ¹⁶ Topĕ vÿ *Abraão* mÿ: “nén ũ há han jé sóg ke mÿ, ã mÿ, ã krĕ'krĕ ag kã ũ mÿ ke gé,” he ja nĩ. Ti krĕ'krĕ ag kã ũn pir hã tó ja ti nĩ, hã vÿ: *Cristo*, he mÿ.

¹⁷ *Moisés* mur ke to hã ke ja vĕ. Tag pãte, 430 (ke) anos tÿg kÿ tóg *Moisés* mÿ ti tÿ ěg jyvĕn ke ěn nĩm. Ge ra tóg ti tÿ *Abraão* mÿ vĕjykre tó ja ěn tÿ tũ' he ja tũ nĩ. ¹⁸ Topĕ tóg ti vĩ hã tugarĩn *Abraão* kren han. Kÿ ěg tóg Topĕ tÿ ěg mÿ: “ěn ve jé ãjag tóg ke mÿ,” hen kÿ venh ke mÿ, *Abraão* nón, ti krĕ'krĕ ag kã ũn pir tũgnĩn, hã vÿ *Jesus*, he mÿ.

¹⁹ Kÿ Topĕ tÿ ne jé *Moisés* mÿ ti tÿ ěg jyvĕn ke ěn tó ja nĕ? ěg tÿ: “vĕjykre tag vÿ pãno nĩ, tag vÿ há nĩ,” he jé, ěg tÿ: “Topĕ vĩ mranh ja inh nĩ,” he jé.

Topĕ tÿ jĕnĕ jafã vÿ *Moisés* mÿ Topĕ vĩ ma kãtĩg ja nĩ. ²⁰ Kÿ *Moisés* tóg Topĕ ri kén *Israel* ag jyvĕn ja nĩgtĩ, ag tÿ Topĕ vĩ ki króm jé. Hã ra Topĕ tóg ti tÿ *Abraão* mré vĕmĕn kÿ ti pir mÿ ti mÿ tó. Ti pijĕ ũ jĕnĕ ja nĩ, ti tÿ ri kén ti mré vĕmĕn jé. *Jesus* mur tÿg ki ke ja vĕ.

Topĕ tÿ vãsÿ ěg jyvĕn

²¹ “Topĕ tÿ ěg jyvĕn mÿ ra ěg tóg ti vĩ mranh tĩ. Kÿ tóg ěg kren han ke tũ nĩ,” he ãjag hÿn tĩ. Hÿ, ti tÿ ěg jyvĕn mÿ ra ěg tóg mranh tĩ. Ti tÿ ěg jyvĕn tÿ ěg

kren han ra ěg tóg vėsóg ki jykre kuryj nýtĩnh mũ vĕ. ²² Hã kÿ tóg: “vĕnh kar vÿ Topĕ vĩ mranh kãn ja nĩgtĩ,” he mũ, ti vĩ rá ki. Ěg tÿ *Jesus* ki ge hã tugrĩn ěg tóg krenkren ke mũ sir.

²³ Kÿ, ěg tÿ *Cristo* ki genh ke to hã ěg tóg Topĕ tÿ vãsÿ ěg jyvĕn mũ ěn ki króm ja tũ nĩgtĩ. Kÿ tóg ti tÿ ěg mrãnmrãn ri ke ja nĩgtĩ, ti vĩ ti. Ěg tÿ *Cristo* ki ge kÿ ěg tóg hã ra kygvar kÿ nÿtĩ sir. *Cristo* mur to hã ke ja vĕ, Topĕ tÿ vãsÿ ěg jyvĕn ja ěn ti. ²⁴ Ěg jyvĕn ja tóg nĩgtĩ, ěg tÿ *Cristo* ki rãn h ke to jykrén jé. *Cristo* ki ge tugrĩn ěg tóg Topĕ mÿ tÿ ùn há nÿtĩ ha. ²⁵ Kÿ, ěg tÿ ti ki rá kar kÿ ěg tóg Topĕ tÿ vãsÿ ěg jyvĕn mũ ěn to jykrén mãn tũ nĩ ha.

²⁶ Topĕ krĕ vÿ tÿ ěg nÿtĩ ha, ěg tÿ *Jesus Cristo* ki ge kÿ nÿtĩn kÿ. ²⁷ Ti jiji tó kÿ ěg kygpe kÿ nÿtĩ, kÿ ěg tóg tÿ ti ri ke nÿtĩ ha. ²⁸ Hã kÿ ěg tóg tÿ jagnĕ ri ke nÿtĩ gé. Kÿ *Judeu* ag vÿ fóg mré tÿ jagnĕ ri ke nÿtĩ ha, kanhgág ag ke gé. Û *camarada* ag vÿ ag *patrão* ag ri ke nÿtĩ gé. Ag vÿ fag ri ke nÿtĩ gé. Nén ù pir vÿ tÿ ěg nÿtĩ, ěg tÿ *Jesus Cristo* ki ge kÿ nÿtĩn kÿ. ²⁹ Kÿ, ěg tÿ tÿ *Cristo* mré ke nÿtĩn kÿ ěg tóg tÿ *Abraão* krĕ'krĕ nÿtĩ gé sir, ěg kar. Kÿ ěg venh ke mũ sir, Topĕ tÿ *Abraão* mÿ nĕn to ja ěn ti.

4

Topĕ krĕ

¹ Sÿ ãjag mÿ kãmĕn mãn ke vĕ, sÿ nĕn tó ja tag ti. Ûn riko kósĩn vÿ ti tũ mãn kãn ke mũ, ti mog kÿ. Ti sĩ nĩn kÿ tóg nĕn ù venh ke tũ nĩ ver. Ti panh *camarada* ri ke tóg nĩ ver. Hã ra ti panh tÿ nĕn kar vÿ tÿ ti tũ nÿtĩnh ke mũ. ² Ti sĩ nĩn kÿ ag tóg ver ti

kanhrän tĩ. Kejĕn tóg ti panh tÿ ti mÿ kurã nĩm ja ĕn pétĕm ke mũ. Ĕn kã tóg ti tũ mãn kãn ke mũ sir. ³Ge ti nĩgtĩ ĕg mré, ĕg tÿ tÿ Topĕ krĕ nÿtĩn kÿ. *Jesus* mur ke to hã ĕg tóg gĩr ri ke nÿtĩ ja nĩgtĩ. Nén kar tãn kamĕg ja ĕg tóg nĩgtĩ, nĕn tãn mré hã. Ĕg sigse ri ke han ja ag nĩgtĩ, misu tãn ag. ⁴Ti kurã tá krÿg kÿ Topĕ tóg ti kósin jĕnĕ. Ĕprã ke fi ki tóg mur. *Moisés* tÿ ĕg jyvĕn ja ĕn ki króm kãn ja tóg nĩgtĩ. ⁵Ĕg kren han jé tóg mur, ti tÿ nĕn kar tãn ĕn to ĕg kygvãn jé sir, ĕg tÿ vãhã tÿ Topĕ krĕ pĕ nÿtĩ jé sir. Tÿ ĕg ti krĕ tũ ja nÿtĩgtĩ vĕ, hã ra Topĕ tóg ĕg jĕ'ÿn sór mũ ha sir.

⁶Kÿ ĕg tóg tÿ ti krĕ nÿtĩ sir. Hã kÿ tóg ĕg mÿ ti kuprĩg jĕnĕg mũ sir, ti tÿ tÿ ĕg jagrĕ nĩ jé. Ti kósin kuprĩg ri ke ti nĩ, Topĕ kuprĩg ti. Ĕg jagrĕ tag tÿ ĕg tóg sir Topĕ to: “ĕg jóg mág,” he tĩ. ⁷Hã kÿ ĕg tóg tÿ nĕn ũ tãn krĕm ke tũ nÿtĩ ha. Topĕ krĕ vÿ tÿ ĕg nÿtĩ ha. Kÿ, ĕg tÿ tÿ ti krĕ nÿtĩn kÿ ĕg tóg ti tÿ nĕn mãn ke mũ gé sir, Topĕ tÿ ĕg mÿ nĕn nĩm ke mũ ti.

Paulo tÿ krĩ kufy nĩ

⁸Vãsÿ ājag tóg Topĕ ki kagtĩg ja nÿtĩgtĩ. Kÿ ājag tóg ón kÿ vĕnh kãgrã hã to: “ĕg Topĕ vĕ!,” he ja nĩgtĩ. Vĕnh kãgrã pijé tÿ Topĕ nĩ'. Vĕnh kãgrã hã nón mũn kÿ ājag tóg sigse kÿ nÿtĩ ja nĩgtĩ. ⁹Ūri ājag tóg Topĕ ki kanhró nÿtĩ jāvo. Hã ra tóg vãsÿ ājag ki kanhró nĩ ja nĩ vĕ, Topĕ ti, ha mĕ. Kÿ ājag tÿ ne jé tÿ nĕn kar tãn ag mré ke nÿtĩ mãn sór nĕ? Krój ti nÿtĩ, nĕn kar tãn ti. To ĕg jagtar' he ja nĩgtĩ. Sigse kÿ ĕg nÿtĩ ja nĩgtĩ, ĕg tÿ tÿ ag mré ke ja nÿtĩn kÿ. Ājag mÿ sigse kÿ nÿtĩ mãn sór mũ? ¹⁰Kurã to ājag tóg jykrĕn sór mũ, kurã kórég to, kar kÿ kysã kórég to ke gé, prÿg kórég to ke gé. ¹¹Kÿ sóg kanĕ jur tĩ, sÿ tag mĕ kÿ.

Inh hÿn fagrĩnh mÿ ag mÿ *Jesus* kãmén, he sóg tĩ, mÿr.

¹² Inh kanhkã, inh ri ke nÿtĩ sórm nĩ. Ājag mré ke vÿ tÿ inh nĩ, kÿ inh ri ke han sórm nĩ. Tag hã to sóg vĩ mũ, ājag mÿ. Ājag pijé inh jũ han'. ¹³ Sÿ ājag ki jun vén mũ ěn mũ ěkré, sÿ ājag mÿ Topě vĩ to vén mũ ěn mũ. ěn kã sóg kaga nÿ ja nĩgtĩ. ¹⁴ Kÿ tóg ājag mÿ e tĩ ja nĩgtĩ, ājag tÿ inh kaga ven kÿ. Ge ra ājag tóg iso é he ja tũ nĩgtĩ. Ti pijé ājag tÿ jěgry ja nĩgtĩ', inh kaga ti. Inh mÿ ājag tóg vĩ há han ja nĩgtĩ, sÿ tÿ Topě tÿ jěně jafã nĩn kÿ. Ājag tÿ *Jesus Cristo* ki rĩr mũ ěn ri ke han ja ājag tóg nĩgtĩ, isÿ. ¹⁵ ěn kã tóg ājag mÿ sér pě ja nĩgtĩ. Hã kÿ ājag tóg inh jagãgtãn ja nĩgtĩ. Isÿ ājag mÿ ājag kaně to vĩ ra ājag hÿn inh mÿ vin ke mũ vė. Hã ra ti tÿ ne jé ājag mÿ sér tũ tĩ ně, ũri? ¹⁶ Ājag mÿ sóg ki hã to mũ. Inh mÿ tag tugrĩn ājag mÿ kórég nĩ ha'? Inh mÿ tóg e tĩ, tag ti.

¹⁷ Ũ ag tóg ón kÿ ājag mÿ vĩ há han sór mũ. Ag tÿ ājag tÿ inh kato tē han sór vė, ājag tÿ ag hã nón mũ jé sir, isovãnh kÿ. ¹⁸ Há ti nĩ vė, nén ũ há tÿ ājag mÿ sér nĩn kÿ. Isÿ ājag mré nĩn kÿ nén ũ há ěn tóg ājag mÿ sér nĩ ja nĩgtĩ. Kÿ ājag tÿ tag tovãnh tũ nĩn kÿ tóg há tĩ, inh mÿ. Kÿ nén ũ há hã to tar nÿtĩm nĩ.

¹⁹ Inh krě', ājag mÿnh ri ke vÿ tÿ inh nĩ. ěg mÿnh fi ne kaga tĩ', ěg tÿ fi ki mur ken kÿ. Fi kaga tag ri ke han mãn inh nĩ nĩ, ājag to. Ājag tÿ *Cristo* hã ri ke nÿtĩn kÿ tóg há tĩ, sÿ tag hã ve sór vė. Hã jé sóg ěg mÿnh fi kaga ěn ri ke han mãn mũ, ājag tugrĩn. ²⁰ Sÿ ājag mré nĩnh há tóg tĩ, sÿ ājag mré vēmén jé, sÿ ājag mÿ kãmén há han jé sir. Sÿ koměr hã ājag mÿ kãmén há tóg tĩ. Hã ra sóg kaně jur mũ, ājag to, hã kÿ sóg

rán mũ.

Agar fi mré Sara fag to vėjykre

²¹ Ājag kã mĩ ũ tóg *Moisés* tỹ vãsỹ ěg jyvĕn ja ěn han sór mũ. Ājag hỹn mẽ kãn ja tũ nĩ, hã kỹ ājag tóg han sór mũ. Ājag tỹ mẽ há han kãn ja nĩ ra ājag hỹn han sór ke tũ nĩ vē. Vãsỹ vėjykre vē. ²² Tag vỹ rán kỹ nĩ, ha mẽ. *Abraão* vỹ kósin régre nĩ ja nĩgtĩ. Ũ mỹnh fi vỹ tỹ ti *camarada* fi nĩ, kỹ ũ mỹnh fi vỹ tỹ ti prũ pĕ fi nĩ. ²³ Kỹ *Abraão* tóg ti *camarada* fi mré nỹ ja nĩ, ti tỹ ver kófa tũ ra. Kỹ ti kósin tóg fi ki mur mũ sir. Hã ra tóg ti prũ pĕ fi ki ti kófa ra kósin mũ gé sir. Topĕ tỹ ti mỹ: “ã kófa ra ã tóg kósin ke mũ,” he jan hã vē. ²⁴ Topĕ tóg tag han, ěg tỹ ti jykre ki kanhrãn jé, ha mẽ. Topĕ tỹ ěg mré jykrĕn mũ ri ke fag nỹtĩ, *Abraão* prũ fag. *Agar* fi vỹ tỹ *Abraão camarada* ja nĩgtĩ. Ti mré ke pĕ tũ fi vē. Topĕ tỹ krĩ tỹ *Sinai* tá *Moisés* mỹ ti tỹ ěg jyvĕn ke ěn tó ja ěn ri ke fi nĩ. Ũ tỹ vėjykre ěn han mũ vỹ tỹ ũ *camarada* ri ke nỹtĩ, fi kóm. Tỹ ag tóg sir Topĕ mré ke tũ nỹtĩ, ũ tỹ *Judeu* jykre han mũ ag. ²⁵ Kỹ *Agar* fi vỹ krĩ tỹ *Sinai* ri ke nĩ, ga tỹ *Arábia* tá, hã vỹ *Jerusalém* he mũ, ũri. Ũ tỹ *Judeu* jykre han mũ to ken hã vē. Tag pijé ag tỹ Topĕ mré ke han mũ'.

²⁶ Hã ra ěg jamã vỹ kanhkã tá nĩ. *Jerusalém* tãg to ken hã vē, hã vỹ: kanhkã, he mũ. ěg mỹnh ri ke vē sir. *Abraão* prũ pĕ fi ri ke vē sir, *Jerusalém* tãg he mũ tag ti. ²⁷ “Kurĩ ã tóg nĩ, krĕg vãnh ã tóg nĩ. Ge ra mỹ sér tĩm nĩ. Jamã há ra prĕrm nĩ, ã mỹ sér tĩn kỹ. Ā krĕ vỹ e tãvĩ nỹtĩnh mũ. Ũn krĕg mũ fi krĕ e kãfór ti nỹtĩnh mũ, ã krĕ ti,” he ja tóg nĩ, ěg mỹnh tag fi to, Topĕ vỹ tỹ rán kỹ nĩ ki.

²⁸ Kÿ ãg tóg *Isaque* ri ke nÿtĩ. Topẽ tóg ti to *Abraão* mÿ: “ã kófa nĩ ra ã tóg kósin ke mÿ,” he ja nĩ. Kÿ ãg tóg *Cristo* ki ge kÿ tÿ Topẽ krẽ nÿtĩ, Topẽ tÿ ãg to: “inh krẽ vÿ tÿ ãjag nÿtĩnh mÿ,” hen kÿ.

²⁹ Kÿ *Abraão* kósin ve vÿ ti prÿ pẽ fi kósin vóg kónãn ja nĩgtĩ. Ti kófa tũ ra tóg ti kósin ve ãn han. Hã ra tóg Topẽ kuprĩg tugrĩn ti prÿ pẽ fi ki ti kósin han. Kÿ ti kósin ve vÿ ãgno vóg kónãn mÿ. Hã kÿ ãg tóg tag vég tĩ gé, ũri. Ũ tÿ *Judeu* jykre han mÿ ag vÿ ãg vóg kónãn sór tĩ gé ver. ³⁰ Kÿ *Abraão* krẽ ag to tag vÿ rán kÿ nĩ, ha mẽ: “ã *camarada* fi fón nĩ, fi kósin mré,” he ja tóg nĩ. “Ã *camarada* fi kósin pijé ã prÿ pẽ fi kósin mré ã tũ mãn ke mÿ'. Ti pir mÿ ti mãn ke mÿ, ã prÿ pẽ fi kósin ti,” he ja tóg nĩgtĩ. ³¹ Kÿ ãg tóg tÿ ti prÿ pẽ fi kósin ri ke nÿtĩ, ãg tÿ *Jesus* ki ge kÿ nÿtĩn kÿ.

5

Jesus tÿ ãg kygvãn ja

¹ Kÿ *Jesus* tóg ãg kygvã, *Moisés* jykre si ãn to. Hã kÿ *Judeu* ag jykre ãn han sór tũg nĩ. Ũ tÿ tag to ãjag krĩn sór mÿ ãn ag kato tẽm nĩ. Ag nón mÿ sór tũg nĩ, ag tÿ vÿjykre ãn to ãjag sigse mãn tũ nĩ jé sir.

² Hã kÿ sóg ãjag mÿ kãmén mÿ, inh, hã vÿ: *Paulo*, he mÿ. Ha mẽ: ãjag tÿ *Judeu* jykre tugrĩn kren sór kÿ *Cristo* vÿ ãjag mÿ nèn ũ há han ke tũ nĩ. ³ Ha vé, sÿ tag tó mãn ke vë gé, ha mẽ. ãjag tÿ ãjag fár kym kÿ ãjag tóg *Moisés* jykre si ãn ki króm kãn ke mÿ gé sir. ⁴ *Cristo* tovãnh to ken hã vë. Topẽ vÿ ãg jagãgtãn sór mÿ. ãjag tÿ *Moisés* jykre han kÿ ãjag tóg ti tÿ ãg jagãgtãn tag to é he mÿ sir. ⁵ ãjag jãvo ãg tóg ãg tÿ

Jesus ki gen kÿ Topẽ mÿ tÿ ùn há nÿtĩnh mũ. Ëg tÿ ti ki ge kÿ nÿtĩn kÿ ãg tóg Topẽ kuprĩg tÿ jagrẽ nÿtĩ. Ëg jagrẽ tag tugnĩn ãg tóg Topẽ mÿ tÿ ùn há nÿtĩ. ⁶ Ha vé, ãg tÿ *Jesus Cristo* ki ge kÿ nÿtĩn kÿ tóg tÿ nén ù tũ tĩ sir, ù tÿ ti fár kym ja ti, ù tÿ kym ja tũ ti ke gé. Ti ki ge kÿ ãg tóg nÿtĩ, kÿ ãg tóg tÿ nén ù pir nÿtĩ ha. Jagnẽ to há ãg nÿtĩ ha.

⁷ Ha vé, mũ há han ja ãjag nĩgtĩ. ãjag tÿ ne jé tovãnh sór nẽ? ãjag tÿ ne jé vãnh vĩ há kri nĩm sór tũ nĩ nẽ? ⁸ Topẽ tÿ ãjag krĩn pijé'. Ti hã ne ãjag jé prẽr ja nĩgtĩ'. ⁹ Tag to jykrén: *fermento* sĩ vÿ ãg tÿ ãmĩ kujãgja kÿ kri rũm ke tĩ, kÿ tóg tÿ sónsón ke kãn tĩ. Topẽ vĩ kujãgja vÿ ge nĩ, ha mẽ. Ke tũg nĩ. ¹⁰ Ëg *Senhor* tũ vÿ tÿ ãjag nÿtĩ. Hã kÿ sóg ãjag to: ag hÿn ti tovãnh ke tũ nĩ, he tĩ. Ag hÿn ti japry jagma mũ mãn ke mũ, he sóg tĩ. ù tÿ ãjag krĩn kónãn mũ ãn ne vësÿrénh ke mũ', ti tÿ tÿ pã'i nĩ ra'.

¹¹ Inh pijé ãg gré fár junun kym to: ke ra, he tĩ'. Isÿ ag mré tag tó ra ag hÿn inh vóg kónãn ke tũ nĩ vë. Ëg tÿ ãg fár kym tugrĩn krenkren ke nÿtĩ ra ãg tóg *Jesus* tÿ ka to sa ja ãn to krenkren ke tũ nĩ vë, kÿ tóg ag mÿ sér tĩ vë. Inh pijé tag tó tĩ'. ¹² ù tÿ tag tó mũ ag jé ag grãfy kym kãn, ù tÿ ãjag krĩn kónãn mũ tag ag.

¹³ Hã ra Topẽ tóg ãg jé prẽr, ti tÿ ãg kygvãn jé. Kÿ ãg kygvar kÿ nÿtĩ ha. Ge ra ãg tóg ãg tÿ vësóg ki nén to jykrén mũ ãn han sór ke tũ nĩ, ti kórég nĩn kÿ. Ëg tÿ jagnẽ to há nÿtĩ tag hã ne há nĩ'. Jagnẽ ki rĩr to ken hã vë. ¹⁴ Ha vé, Topẽ tÿ ãg jyvën e ãn ki króm kãn jé ãg tóg ke mũ, ãg tÿ nén ù pir han kÿ, hã vÿ: “ã régre ki rĩr há han nĩ, ã tÿ vãnh ki rĩr há ri ke han nĩ, ã régre ki,” he mũ. ¹⁵ Jãvo ãjag tóg mĩg ri ke jagnẽ

mãn sór mũ, jagně to jũn kŷ. Jagně tŷ tũ' he jé ãjag tóg ke mũ, gen kŷ, ha vem nĩ.

Ěg tŷ ěg tŷ nén to én mũ ěn han ke tũ

¹⁶ Hã kŷ sóg ãjag mŷ: “Topě kuprĩg tŷ ãjag mŷ nén to mũ ěn hã han nĩ,” he mũ. Kŷ ãjag tóg ãjag tŷ nén to én mũ ěn han ke tũ nĩ. ¹⁷ Ěg tŷ nén to én mũ vŷ Topě kuprĩg kato tẽ nĩ. Kŷ Topě kuprĩg vŷ ěg tŷ nén to én mũ ěn kato tẽ nĩ gé. Jagně to rárá ag tóg tĩ. ¹⁸ Ěg tŷ hã ra Topě kuprĩg tŷ ěg mŷ nén to mũ ěn han kãn kŷ tóg ěg se mãn ke tũ nĩ sir, vãsŷ *Moisés* jykre si ěn ti.

¹⁹ Ěg tŷ vėsóg ki nén to jykrén mũ ěn vŷ kórég nĩ. Věnh kar vŷ ki kanhró nŷtĩ. Ěg tŷ vėsóg ki nén to jykrén mũn hã vě, hã vŷ: mén tũ mré nŷ, prũ tũ mré nŷ, nén ũ kavéj han tĩ, ěg tŷ nén to én mũ kar han tĩ, ²⁰ ěg tŷ věnh kãgrá to: Topě vě, he tĩ, kujá jykre han tĩ, jagně kato vãsãn tĩ, jagně to ěg fe tŷ gŷm ke (ka)mě, jagně tũ to jykrén kónãn tĩ, vėsŷ ũn mág han sór mũ, věnh kãpãm kŷ nŷtĩ sór mũ, ²¹ jagně tũ to én tĩ, kronkron tĩ, krĩn tũ, he mũ, vějykre pãno han tĩ tŷ hěn ri ke ke gé. Tag to sóg ãjag jyvěn huri. Hã ra sóg to mãn sór mũ. Ũ tŷ tag han mũ ag pijé Topě tŷ tŷ ěg pã'i nĩ venh ke mũ'.

²² Topě kuprĩg tŷ ěg kanhrãn mũ vŷ kórég tũ nĩ. Há kar ti nĩ. Ti tŷ ěg kanhrãn to ken hã vě, hã vŷ: jagně to há, he mũ, mŷ sér tĩ, krĩ kuprã, jagně to fe há nŷtĩ, koměr hã vĩ, jagně jagãgtãn tĩ, jagně mŷ ón vãnh, ²³ vėsŷ ũn mág han sór tũ, vėsó jykrén tĩ, he mũ. Topě pijé tag kato tẽ tĩ'. Ti tŷ vãsŷ ěg jyvěn ti vŷ tag ri ke ja nĩgtĩ gé, *Moisés* jykre si ěn ti. ²⁴ Ěg tŷ tŷ *Jesus Cristo* tũ nŷtĩn kŷ ěg tóg ti tŷ ka to sa ja ěn ri

ke nýtĩ. Hã kÿ ãg tóg ãg tÿ nén to én mÿ ên han mãn sór ke tũ nĩ ha sir, ãg tÿ nén ki vėĩ mÿ ên.

²⁵ Ëg tÿ Topě kuprĩg tÿ jagrě nýtĩn kÿ ãg tóg ti tÿ ãg mÿ nén tó mÿ ên han kãn ke mÿ sir, ti kuprĩg tÿ ãg mÿ nén tó mÿ ên ti. ²⁶ Kÿ ãg tóg sir tÿ ùn mág nýtĩ sór ke tũ nĩ. Jagně jũ han mãn sór ke tũ ãg nĩ. Jagně tũ mãn sór ke tũ ãg nĩ gé. Vějykre há hã han jé ãg tóg ke mÿ.

6

Ëg tÿ jagně jagãgtãn ke

¹ Inh kanhkã', kejěn ãjag kã mĩ ù tóg kygněg tĩ, vėnh vatánh tá. Kÿ ti mÿ: “ã mÿ kygně ja tũ?” hem nĩ, ãjag tÿ Topě kuprĩg tÿ jagrě nýtĩn kÿ. Koměr hã ti mÿ tóm nĩ. Kÿ vėso jykrén há han nĩ gé, ãjag tÿ ti kóm kygněg tũ nĩ jé. ² Jagně jagãgtãn nĩ, ãjag mré ke ù tÿ jagtar nĩn kÿ. *Cristo* tÿ ãg jyvěn mÿn hã vė. ³ Kejěn ù tóg vėsóg ki vėsÿ ùn mág han sór mÿ. Hã ra tóg tÿ nén ù tũ nĩ. Ti tÿ kygně vė. Vėnh hã mÿ tóg ón mÿ sir. ⁴ ãjag jykre tugnÿm nĩ. Ti há nĩn kÿ tóg há tĩ. Jagně mÿ: “inh jykre há vÿ ã jykre há kãfór nĩ,” he tũg nĩ. ⁵ Topě hã ne ãg ki ãg jykre há ên vėg tĩ'. Kar kÿ tóg ãg mré ke ag jykre ki kanhró nĩ gé.

⁶ Kejěn ù tóg ãjag mÿ Topě vĩ kãmén mÿ. Ti mÿ ãjag tÿ nén ù vin nĩ, ti tÿ ãjag mÿ kãmén mÿ kaja ti.

⁷ Kygně tũg nĩ. Ëg tÿ Topě to é he kÿn pijé há nĩ'. Ëg tÿ ón kÿ: “jykre há inh nĩ,” hen kÿ tóg ãg kren han ke tũ nĩ. Topě vÿ ãg jykre ki kanhró nĩ. ⁸ Ëg jykre pãno tÿ ãg mÿ há nĩ ra ãg tóg to ter ke mÿ. Ëg tÿ jãvo Topě kuprĩg tÿ ãg mÿ nén tó mÿ ên han kÿ ãg tóg rĩr krÿg ja tũ ên venh ke mÿ. ⁹ Hã kÿ nén ù há han to krónh ke tũg nĩ. Ve jé ãg tóg ke mÿ, Topě tÿ

ẽg mĩ nén ũ há han ke ti. ¹⁰ Hã kỹ ẽg tóg vẽn kar jagãgtãn ke mũ, ũ tỹ ẽg mré *Jesus* ki ge kỹ nỹtĩ fag mré hã.

Paulo tỹ carta rãn kãn mũ

¹¹ Ha vé, sỹ rá tóg éhé nỹtĩ, sỹ vãhã vėsog ki ãjag mỹ inh nĩgé tỹ rãn kỹ.

¹² Ũ ag tóg: “ãjag fár kym nĩ,” he tĩ. Ag tỹ vėsỹ ũn mág han sór vẽ, ha mẽ. *Judeu* ũ ag tóg ẽg to jũ tĩ, ẽg tỹ fóg ag mỹ: *Judeu* jykre han tũg nĩ,” hen kỹ. Hã ra ag tóg inhhã ag tỹ ag vóg kónãn kamẽg mũ. *Cristo* tỹ krunh to sa ja ra ag tóg ag vėsỹrénh ke kamẽg mũ. Ag vĩ jẽmẽ tũg nĩ. ¹³ Ha vé, ag tỹ ag fár kym ja ra ag tóg Topẽ tỹ vãsỹ ẽg jyvẽn ja ẽn han kãn tũ nĩgtĩ. Ge ra ag tóg ãjag mỹ “ha ké,” he tĩ, vẽn kar ag tỹ ag to vĩ há han jé. ¹⁴ Ag jãvo sóg tỹ ũn mág nĩ sór tũ nĩ. Nén pir tóg inh mỹ sér tĩ, hã vỹ: ẽg pã'i tỹ *Jesus Cristo* tỹ krunh to sa ja ẽn, he mũ. Kỹ sóg ẽprã ke jykre han sór tũ nĩ ha. ¹⁵ Ũ ag tóg ag fár kym tĩ, jãvo ũ ag tóg kym tũ nĩgtĩ gé. Hã ra tóg tỹ nén ũ tũ nĩ gé. Topẽ mỹ ẽg há nỹtĩ, ẽg tỹ ti ki ge kỹ nỹtĩn kỹ, ẽg kar. Topẽ vỹ ẽg han mãn, kỹ ẽg tóg tỹ ũn tãg nỹtĩ ha. Tag hã ne há nĩ!. ¹⁶ Ũ tỹ vễjyre tãg tag han mũ ag krĩ kuprãg ti tĩ, Topẽ ti. Ũ tỹ ge jagãgtãn ti tĩ, ẽg. Tỹ ẽg Topẽ tũ nỹtĩ ha, ti *povo*.

¹⁷ Kỹ inh kutãn mãn tũg nĩ. Inh vėsỹrénh han mãn tũg nĩ. *Jesus* vėsỹrénh ja ẽn ri ke han inh mỹr. Inh kygve vỹ e nỹtĩ.

¹⁸ Inh kanhkã', ẽg pã'i tỹ *Jesus Cristo* jé ãjag tar han, ti jé ãjag krĩ kuprãg. Hã vẽ.

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 26 Mar 2022
16af52c8-0e45-5e91-b36c-cd314d36d7fc